

Die fürsten kamend in das schloß
mit knechten zuo fuoß und auch zuo
roß,
den Franzen tetens finden,
er redt mit inen on verdroß,
die warhait wil ich singen, ja singen.

Als nun die red ain ende nam
da starb von stund der werde man,
das mueß doch got erbarmen!
kain beßer krieger ins land nie
kam,
er hats gar vil erfahren, erfahren.

Er hat die landsknecht all geliebt,
hat inen gemachet guot geschirr,
darumb ist er zuo loben;
sein somen ist noch bei uns hie,
es pleibt nit ungerochen, ungerochen.

Die fürsten zugenb weiter dann
gen Tradenfels, also genant,
das haben si verprennet;
got tröst den Franzen lobesan!
sein land wirt gar zertrennet, zer-
trennet.

Also wil ichs beleiben lon,
es möcht noch kosten manchen man,
ich wil nit weiter singen,
gefelt villeicht nit iederman,
wir mueßend bald von hinnen, von
hinnen.

Der uns das lieblein neuß gesang,
ain landsknecht ist ers ja genant,
er hat es wol gesungen:
die sach ist im gar wol bekant,
von Landstal ist er kommen, ja
kommen.

Maislied.

Herzlich tut mich erfreuen
die frölich summerzeit,
all mein geblüt verneuen,
der mei vil wollust geit;
die lersch tut sich erschwingen
mit irem hellen schal,
lieblich die vöglin singen,
voraus die nachtigal.

Der lueck mit seim schreien
macht frölich iederman,
des abends frölich reien
die meidlin wolgetan;
spazieren zu den brunnen
pfllegt man in diser zeit,
all welt sucht freud und wunne
mit reisen fern und weit.

Es grünet in den welden,
die bäume blien frei,
die röslin auf den selden
von farben mancherlei;

ein blümlin stet im garten,
das heißt Bergiß nicht mein,
das edle kraut Wegwarten
macht guten augenschein.

Ein kraut wechßt in der awen
mit namen Wolgemut,
liebt ser den schönen frawen,
darzu holunderblut,
die weiß und roten rosen
helt man in großer acht,
kan gelt darumb gelosen,
schön krenz man darauß macht.

Das kraut Ze lenger ie lieber
an manchem ende blüt,
bringt oft ein heimlich sieber,
wer sich nicht dafür hüt;
ich hab es wol vernommen
was dißes kraut vermag,
doch kan man dem vorkommen:
wer Maßlieb brauchet all tag.